

**Date – 05/04/2026**

**Time - 7:30 -7:40 Hrs**

**AKASHVANI AIZAWL**

**REGIONAL NEWS BULLETIN**

**HEADLINES (MORNING)**

1. Tukin khan Kristian te ni pawimawh, Isua Krista, thihna hneha a thawhlehna ni, Easter Sunday pualin Mizoram chhunga kohhran hrang hrangin hun an hmang.
2. Supply department chuan tun dinhmunah tuialhthei leh eirawngbawlna gas dinhmun a that thu an sawi.
3. AMC inthlan lo awm turah Election Model Code of Conduct bawhchhiaa puhna tam tham tak a lut tawh.
4. Petroleum and Natural Gas Ministry chuan ram pumah Petrol, Diesel leh LPG a hnianghnar theih nan theihtawp an chhuah thu a sawi.



**EASTER**

Tukin khan Kristian te ni pawimawh, Isua Krista, thihna hneha a thawhlehna ni, Easter Sunday pualin Mizoram chhunga kohhran hrang hrangin hun an hmang.

Kohhran hrang hrangin zingkarah thalai leh Kohhran huaihawtin Sunrise Service Biak In chhungah leh Biak In kawt remchangah an hmang a ni.

**SFX Sunrise Service**

Kohhran tam zawkah chuan chawhma, chawhnu leh zanah Easter Sunday pualin hun hman chhunzawm a ni ang a, Kohhran thenkhatah chuan heng inkhawmah te hian thupui inang an nei ang a, chawhma inkhawm banah thingpui ruai an buatsaih bawk ang a, inkhawm pangngai bakah Kohhran thenkhat chuan lengkhawmin hun an hmang dawn bawk a. Kohhran hrang hrangah Kohhran thalai leh naupang ten nizan atang khan Easter artui te cheiin vawiina inkhawm te tan an sem dawn a ni.

Presbyterian kohhran chuan thupui thuhmun, chawhmaah ‘Isua thawh leh thu zep bo an tum’ tih te, chawhnu inkhawmah ‘Sawmtute hnar ngai lo Lal Isua’ tih leh zan inkhawmah ‘Ringtute nghahfak - Thawhlehna’ tih te thupuiah an nei ang a. Baptist Kohhran tam zawkah chuan chawhma leh zanah Easter Sunday pualin hun an hmang a, chawhma banah puitling leh naupangin a hrangin Sunday School an nei tel bawk a ni.

Salvation Army te chuan zingkarah Isua Krista thawhlelna puangin Corp hrang hranga band ten rimawi an tum a, chhun leh zanah Easter Sunday pualin inkhawm leh hun hrang hrang an buatsaih ang.

### **SFX Salvation Army Band**

United Penticostal Church - Mizoram leh North East India te chuan an remchan angin anmahni kohhran theuhah hun an buatsaih bawk a. Thingpui ruai an buatsaih tlangpui a, kohhran thenkhatah tlaiah ruai an theh dawn bawk a ni.

Catholic kohhran chuan Inrinni zan khaw thim fel atangin Isua thawhlelna Easter hi an lawm tan a. He inkhawm hi Catholic Kohhranah chuan inkhawm zawnga urhsun ber leh ropui bera neih a ni a. Vawiin Easter Sunday-ah pawh mass nei lehin kohhran tam zawk chuan ruai an theh a. Zan lamah sathau khawnvar chhi engin Isua thawhlelna Easter procession neiin mawmbati kawngzawh an nei leh dawn a. Khawvel puma Catholic kohhran te Easter Sunday hman dan hi a inang vek a ni.

Heng bakah hian Kohhran hrang hrangin Mizoram pumah Easter Sunday pualin hun an hmang dawn a ni.

<><><>

### **MIZORAM'S LPG & POL**

Food, Civil Supplies & Consumer Affairs department chuan thuchhuah siamin tun dinhmunah tuialhthei leh eirawngbawlina gas dinhmun a that thu an sawi.

Nimina thuchhuah an siamah he thu hi sawiin Supply department chuan tunlai geo politics avangin eirawngbawlina gas leh tuialhthei a harsatna thleng thei lakah Mizoram sorkar chuan ngawrh takin hma a la reng tih an sawi a. Tun dinhmunah eirawnbawlina gas, LPG leh tuialhthei te a thlen that thu leh mipuite tan chiaina tur a awm loh thu an sawi a ni.

Supply department tarlan danin nimin thleng khan eirawngbawlina gas bur pangngai (domestic) kg 14.2 a rit chi chu bur 13,907 stock awmin kawnga thang mek chu bur 28,011 a nih thu leh Mizoram tana awm mek chu bur 41,918 a nih thu an sawi a. A bur lian chi (commercial), kg 19 a rit chi chu bur 514 stock awmin kawnga thang mek bur 276 a awm thu leh a vaiin bur 790 Mizoram tan a awm mek thu an sawi a. Tuialhthei lamah pawh petrol litre nuai 13 sing 2 sang 9, 600 stock awm mekin kawnga thang mek litre nuai 4 sing 7 a awm bawk a. Diesel chu litre nuai 14 sing 1 sang 2, 300 stock awmin kawnga thang mek litre nuai 6 sing 4 sang 1 a awm tih an sawi bawk a ni.

<><><>

### **EMCC VIOLATIONS**

Tun thla April ni 21 a Aizawl Municipal Corporation (AMC) bial/ward 19 inthlan vote thlak lo awm tura Election Model Code of Conduct (EMCC) bawhchhia a puhna tam tham tak a lut tawh.

Hriat theih chinah Principal Chief Conservator of Forests (PCCF) pisa-in March ni 21 a LDC (provisional employee) atana mi 15 lakna tur advertisement an lo chhuah chu State Election Commission chuan a ngai thutak hle a. EMCC bawhchhiatna a nih thu PCCF leh advertisement lo tihchhuahsaktu Director, Information & Public Relations chu insawifiah tura tih an ni a. State Election Commission hmaah inlanin, an thil tih cancel tira ngaihdam an ni. Thla hlui (March) ni 18 a AMC inthlan puan a nih atanga ni 28 thleng khan hna lak, advertisement chhuah, hna lakna atana interview leh sorkarin inkhawm buatsaih ang chi dilna chi hrang hrang 16 chu SEC-ah a lut a. EMCC tlawhchhana dilna 16 lut zinga 6 hi tih

khapsak an ni a. Dilna 6 chu intiamkamna nen phalsak an ni a, pakhat chu exempt a ni a, a dang zawng chu thurawn pek an ni.

State Election Commissioner Dr. H. Lalthlangliana chuan hna leh ruahmanna kal laklawh lai chu ngaihnathiam a nih rualin thil thar, eng political party berin emaw inthlanna a hlawkna an tel theihna tur ang chi chu khap a nih thu a sawi a ni.

<><><>

#### **AIR NEWS ON SOCIAL MEDIA**

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihtlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

#### **MNF**

MNF thalai President Pu Robert Romawia Royte, MLA chuan kum liam ta 2025-26 chhunga SASCI sum kir leh 'lapse' cheng nuai sing 3 chuangah Chief Minister, Finance Minister ni bawk chuan mawh la ngam se a duh thu a sawi.

Nimina Aizawl Press Club-a chanchinbumite a kawmnaah he thu hi sawiin Pu Robert Romawia Royte chuan ZPM sawrkar tirh 2023-24 kum khan SASCI Part-1 sum sanctioned sa thlap cheng nuai 23,331 chu 1st Instalment sum a Implementing Department a pek tlai avangin a lapse vek tawh tih a sawi a. He hi Assembly thutkhawm wawi 9-na session tum 6 naah a zawhna chhannaah ngemngheh a nih thu a sawi a. Tun tumah hian SASCI sum lapse tharlam a awm leh tih sawiin Pu Robert Romawia Royte chuan kum 2025-26-ah SASCI Part I hnuaiah Mizoram tan cheng nuai 32,800 dah sa a nih thu a sawi a. SASCI SASCI Part-I dan angin Rs 32,800 lakh a zaa 66, cheng nuai 21,648 chu 1st Instalment-ah Mizoram sawrkar-ah rawn release nghal a nih thu a sawi a. He tah hian mak tak erawh chu 1st Instalment Rs 21,648 lakh chu dawng reng siin UC an submit theih loh avangin a 2nd Instalment sanctioned sa thlap cheng nuai 11,152 chu a lapse leh ta vek tih a sawi a.

Heti hian tun ZPM sorkar kum 2 leh tlem chhung lekin SASCI Part-I hnuaiah wawi 2 sum tam tham tak, cheng nuai 34,483 a lapse tih a sawi a. An sorkar laiin engmah lapse a awm ngai lo tih sawiin a thuneitu mawh liau liau a nih thu a sawi a ni.

<><><>

#### **MJA**

Nimin khan Aizawl Press Club-ah Mizoram Journalists' Association (MJA) General Headquarters hruaitu atana thlan tharte hnenah charge hlan a ni.

President kalchhuak C. Lalrambuatsaiha chuan President thlan thar Vanlalrema Vantawl hnenah charge a hlan a. Vice President C. Lalhmachhuana, Youth Herald chuan a post ngai a chelh nawn leh a. Treasurer kalchhuak Lalrinmawia Sailo chuan Treasurer thar Zohmingmawia hnenah charge a hlan bawk a ni.

President thar Vanlalrema Vantawl chuan MJA hmalakna tur sawiin, Press Club culture tihnun leh a ngaih thu a sawi a. Welfare ah hmalak a tul thu sawiin hmarchhak state journalist welfare-ah Mizoram chu a nei tha zingah an tel pha lo tih sawiin welfare mumal zawk nei turin theihtawp chhuah a tul thu a sawi a. News lamah inel a tul tih sawiin hemi atan hian platform siam an tum dawn thu a sawi bawk a ni.

MJA President chuan MJA Constitution tlawhchhanin General Secretary leh Secretary pathum a ruat nghal.

General Secretary atan K. Zothanpara, Vanglaini bakah Secretary atan H. Lalchhandama, The Zozam Times i/c Organisation, Property, Finance; Samuel Lalruatsanga, Zonet TV i/c Information and Publicity, Protocol; leh Lalbiakzama, Entlang i/c Welfare a ruat baw a. Executive Member atan mi 5 a ruat baw a ni.

<><><>

## **Ministry on Petroleum**

Petroleum and Natural Gas Ministry chuan ram pumah Petrol, Diesel leh LPG a hnianghnar theih nan theihtawp an chhuah thu sawi. Mipuite chu Petrol Diesel leh LPG te hlauhthawn vanga lei khawl amaw booking tih a ngaih loh thu a sawi.

Ministry chuan Kilo 5-a rit cylinder chu LPG distributor-ah lei theih reng a ni a, ID proof nen engtiklai pawhin a lei theih a ni a ti. Ministry chuan kilogram nga rit cylinder lei tur chuan address proof a ngai lo tih a sawi baw. Thla hmasa ni 23 aṅang khan kilogram nga rit cylinder nuai nga leh nuai 70 vel hralh a nih thu a sawi baw. Online LPG cylinder booking chu zaa 95- ah a pung tih a sawi a, nimin khan domestic LPG cylinder nuai 51 hu vel an thawnchhuak baw. Ministry chuan mipuite chu fuel dang PNG, induction leh electric cooktop te hmang turin a fuih baw a ni.

<><><>